

Dithero tsa Tirelano mo Kutlwanong

43/2015 Thero ka Sontaga wa 11 morago ga moletlo wa Borarobongwe, e le ka 16. 08. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno, le kwadilwe mo go 1 Pet. 5:5b, le re: **"Modimo o ganetsa ba ba ikgogomosang, mme ba ba ikokobetsang o ba naya boitshwarelo."**

1. Sefela sa 176 - 159/166

2. Thapelo: Modimo o o Borarobongwe, wena yo e leng Rara le Morwa le Mowa o o Boitshepo, re atamela fa pele ga sefatlhago sa gago le kajeno go utlwa Lefoko la gago. Ke gore re sa ntse re tla go utlwa lefoko la gago, o re fe Mowa wa gago o o Boitshepo gore re ipone, fa re le baleofi, re se ka ra iikanya, mme re ikanye bopelotlhomogi jwa gago, o bo re abele ka ene Jesu Keresete, Mopholosi wa rona. Amen.

3. Lefoko la Testamente e kgologolo le kwadilwe mo go 2 Sam. 12:1-15a;

Epistolo ka fa thulaganyong ya 2 e kwadilwe mo go Baefeso 2:4-10;

Efangele ka fa thulaganyong ya 3 e kwadilwe mo go Matheo 21:28-32.

4. A go ipolelwe tumelo ya bokeresete!

5. Sefela sa 178 - 161/168

6. Thapelo ya mmadi wa thero.

7. Efangele ka fa thulaganyong ya 1 e kwadilwe mo go Luka 18:9-14, e re: "Le gona Jesu a bua ka setshwantsho se le bangwe ba ba iikanyang gore ba siame, mme ba nyatsa ba bangwe, a re: 'Batho ba babedi ba kile ba ya kwa Tempeleng go rapela, mongwe e le Mofarisai, yo mongwe e le mokgethisi. Mofarisai a ema, a ithapelela jaana a re: 'Modimo, ke a go leboga, ka ke sa tshwane le batho ba bangwe, e bong dinokwane le basiamolodi le bagokafadi, gongwe jaaka mokgethisi yo. Ke itima dijo gabedi ka beke; ke kgetha bosome jwa tsotlhe tse ke di amogelang.' Mokgethisi ene a emela kgakala, le matlho a se ka a rata go a tsholeletsa kwa legodimong, mme a itshwara seledu a re: 'Modimo, intshwarele nna moleofi!' Ke lo raya ke re: 'Yo, o fologetse kwa ntlong ya gagwe a atlholetsewe tshiamo, e seng yole;

gonne mongwe le mongwe yo o ikgodisang o tla kokobediwa, mme yo o ikokobetsang o tla godisiwa.” Amen.

8. Thero: Phuthego e e rategang ya Morena wa rona Jesu Keresete, re mo Disontageng tsa sebaka morago ga moletlo wa Borarobongwe, se e leng sebaka se re lebogang, le go tumisa ka sona Modimo o o Borarobongwe, ona o e leng Rara le Morwa le Mowa o o Boitshepo ka ntlha ya ditiro tse dikgolo tsa ona tse a di re diretseng ka bopelonomi jwa ona. Kajeno ke Sontaga sa 11 morago ga moletlo wa Borarobongwe. Phuthego, go ntse jaana, mafoko a thero ya kajeno a ntshitswe mo gare ga ditshwantsho dingwe tsa Morena Jesu. Mo setshwantshong se re ruitwang ka sona kajeno, Jesu o re tlhagisetsa ka sona batho bangwe ba ba neng ba iikanya, ba ba reng: ba siame, mme ba nyatsa ba bangwe.

Phuthego, **a le rona re latlheng go iikanya** gonne

1. Yo o ikgodisang o tla kokobediwa;
2. Yo o ikokobetsang o tla godisiwa.

1. Yo o ikgodisang o tla kokobediwa. Phuthego, mo mafokong a thero ya kajeno, re fitlhela Jesu a tlhagisetsa batho bangwe, e le ba ba neng ba iikanya, le go ikaya gore ba siame, ba nyatsa ba bangwe, a ba bolelela setshwantsho, a re: “Batho ba babedi ba kile ba ya kwa Tempeleng go rapela, mongwe e le Mofarisai, yo mongwe e le mokgethisi.” Phuthego, gore re tlhaloganye kang e sentle, ke tshwanelo gore re itse gore Bafarisai le bakgethisi e ne e le batho ba ba ntseng jang. Bafariai e ne e le batho ba ba lekileng tota go tshegetsa molao wa Modimo, ka go o dirafatsa, ba itsiwe ke batho gore ke batho ba ba siameng.

Phuthego, se re se bonang mo setshwantshong seo, ke fa boobabedi, e bong Mofarisai le Mokgethisi ba tthatlogetse kwa Tempeleng ka nako ya thapelo, ba ya go rapela. A re utlweng dithapelo tsa bone! “Mofarisai a ema, a ithapelela jaana a re: 'Modimo, ke a go leboga, ka ke sa tshwane le batho ba bangwe, e bong dinokwane le basiamolodi le bagokafadi, gongwe jaaka mokgethisi yo. Ke itima dijo gabedi ka beke; ke kgetha bosome jwa tsotlhe tse ke di amogelang.' Mokgethisi ene a emela kgakala, le matlho a se ka a rata go a tsholeletsa kwa legodimong, mme a itshwara seledu a re: 'Modimo, intshwarele nna moleofi!’”

Phuthego, fa re leba Mofarisai yo a o ne a bua maaka? A ga aa ka a dira tse tsotlhe tse a di umakang? Nyaya, ga a bue maaka, o bua nnete. Ga diragala gore e ne e se senokwane, le e

seng motho yo o sa siamang. E ne e se mogokafadi. A ipona, fa a sa tshwane le ba bangwe, a itemogela, fa a sa tshwane le bakgethisi. Gape re a mo utlwa, fa a bua ka ga ditiro tse a di dirileng, a di supetsa Modimo, o ka re Modimo ga o di itse. A reng? A re; "Ke itima dijo gabedi ka beke; ke kgetha bosome jwa tsotlhe tse ke di amogelang."

Phuthego, re ka reng, fa re bona motho yo o ntseng jalo?

Re tla re: Tota motho yoo o siame. Ke mokeresete. Ee, fa pele ga batho go ntse jalo, mme fa pele ga Modimo ga se ene. Ke gona re tseanyang, re a botsa gore Modimo o ka mo latlha ka lebaka la eng? O latlha ka ntlha thapelo ya gagwe, a ithapelela, a re: "Morena, ke a leboga," mme tota tota o ne a itebogela fela, gape o ne a ikaya yo mogolo, yo o botoka go gaisa ba bangwe. O ne a sa kope sepe mo Modimong ka thapelo eo, a itebogela fela, fa a sa tshwane le mokgethisi yole. Phuthego, go a bonala gore mofarisai yole o ne a ikanya ditiro tsa gagwe gore o ka ipaakanyetsa bopelotlhomogi jwa Modimo ka tsona, a sa ikanye bopelotlhomogi jwa Modimo. Phuthego, go ntse jalo gore le rona re se ka ra ikanya, le e seng leka go itshiamisa, le e seng go ikanya ditiro tsa rona, re se ka ra itsietsa ka go gopola gore re ka ipaakanyetsa pholoso ka tsona, mme re ikanye bopelotlhomogi jwa Modimo fela jo o re direlang ka jona ka ntlha ya ga Keresete, ka ntlha ya tse re di baakanyeditsweng ka loso le tsogo ya ga Keresete. E tla re re sena go dira tsotlhe tse re di laetsweng, re ipolele, re re: "Re batlhanka ba re se nang molemo; re dirile fela se re neng re tshwanetse go se dira," Luka 17:10, gonne

2. Yo o ikokobetsang, o tla godisiwa ka bopelotlhomogi. Barategi mo Moreneng, mafoko a bofelo mo lefokong la thero ya kajeno, a re: "Mokgethisi ene a emela kgakala, le matlho a se ka a rata go a tsholeletsa kwa legodimong, mme a itshwara seledu a re: 'Modimo, intshwarele nna moleofi!' Ke lo raya ke re: 'Yo, o fologetse kwa ntlong ya gagwe a atlholetswe tshiamo,'" a balelwa tshiamo ka go solofela, le go dumela boitshwarelo. Phuthego, le fano re tshwanetse go itse go re bakgethisi e ne e le batho ba ba ntseng jang, gore re tlhaloganye sentle se se rewang ke Jesu ka setshwantsho sa gagwe. Bakgethisi e ne e le batho ba ba tseileng lekgetho mo bathong, e le badiredi ba Baroma ba ba neng ba sa ratwe ke Bajuta. Go ne go diragala, fa go na le dithoto tse di tliseditsweng mo lefatsheng, di tswa, gongwe di romelwa mo go le lengwe, bakgethisi ba atlhola ka lekgetho, ba le bitsa ka fa selekanyong sa dithoto. Ke fa go diragetse gore bakgethisi bao ba ne ba bitsa lekgetho go feta selekanyo sa se se beilweng ke goromente, ba ikgobokanyetsa tse dintsi ka go tsietsa. Ka moo bakgethisi ba kaiwa ba ba bosula, ba tsietsa batho mo tirong ya bone, ba bidiwa ke Bajuta baleofi, ba ba

neng ba sa letlelelwe go tsena, le e seng mo tempeleng. Ke gona re utlwang, fa mokgethisi "a emela kgakala, le matlho a se ka a rata go a tsholeletsa kwa legodimong, mme a itshwara seledu."

Phuthego, fa re leba mokgethisi yole, re mo kaya motho yo o bosula, mme Mofarisai yole, fa e le yo o siameng. Ke gore mo matlhong a rona mokgethisi a lebega, fa e le moleofi, mme Mofarisai e le mosiami. Mme Modimo o bona boteng jwa pelo ya motho. Ka go buisa mo bofelong jwa lefoko la thero, re bona gore mokgethisi o amogelwa ke Modimo, mme Mofarisai o a latlhwa. Phuthego, re ka botsa gore ke ka ntlha ya lebaka lefe, fa Modimo o amogela mokgethisi yo, yo o neng a itsiwe, fa e le yo o sa siamang fa pele ga batho. A Modimo o a tsietsa ka katlholo ya ona? Karabo re e bona, fa re leba dithapelo tsa batho ba le babedi bao. Re utlwile gore Mofarisai o a leboga, mme mokgethisi o a kopa, a re: "Modimo, intshwarele nna moleofi!" O kopa Modimo ka thapelo ya gagwe. Mofarisai o bua ka ga ditiro tsa gagwe tse a di dirileng, a solofela gore o ka bona ka tsona bopelotlhomogi jwa Modimo, mme mokgethisi a ikanya bopelotlhomogi jwa Modimo. Ke gona a sa bueng ka mafoko a le mantsi mo thapelong ya gagwe, mme a re: "Intshwarele nna moleofi!"

Thapelo eo e bopilwe ke Mowa o o Boitshepo mo mothong yo o iponang maleo a gagwe, a a diragetseng ka go tlola molao wa Modimo, a ipolela gore ke moleofi yo ke inyatsang ka ntlha ya ditlolo tsa me tsa molao wa Modimo, a tlhotlhelediwa gore a intshenkele thuso le kutlwelobotlhoko mo Modimong gore a tlabologe, a ikanye bopelotlhomogo ka ditsholofetso tsa Modimo. Phuthego, katlholo ya ga Jesu e reng ka ga motho yo o ntseng jalo? Jesu a re: "Ke lo raya ke re: 'Yo, o fologetse kwa ntlong ya gagwe a atlholetswe tshiamo.'" Ke a mo itshwarela. Ke mmalela tshiamo ya me. A go utlwale gore mo go Rara yo o mo legodimong, fa go tsamaiwa ka fa maikemisetsong a molao wa gagwe, ga re na tsholofelo go ka phologa, gone a re: "Mongwe le mongwe yo o ikgodisang o tla kokobediwa, mme yo o ikokobetsang o tla godisiwa."

Bomorwa-Rre, mo bofelong a re itlhotlhomiseng, re bots, re re: Re dirileng? A re dirile jaaka Mofarisai, gongwe re dirile jaaka mokgethisi? A re ikantse ditiro tsa rona, gongwe re ikantse bopelotlhomogi jwa Modimo? Fa go tsamaiwa ka fa maikemisetsong a Efangele ya ga Jesu Keresete, tsela re e baakanyeditswe, gone go kwadilwe gore "gone lo pholositswe ka boitshwarelo ka tumelo; mme ga go tswe mo go lona, ke neo ya Modimo. Ga se ka ditiro gore

go se nne ope yo o ipokang,” Baef. 2:8-9, ke maikemisetso a bopelotlhomogi jo bogolo jwa Modimo ka fa Efangeleng ya ga Jesu Keresete.

Modimo, Rara wa rona yo o mo legodimong ka ene Jesu Keresete Morwaaona, a a re thuse rotlhe ba re phuthegetseng mo tirelong-Modimo eno le kajeno, o re abele Mowa o o Boitshepo wa gagwe gore le rona re se ka ra iikanya, re se ikaye ba ba botoka go feta ba bangwe, re se ikanye ditiro tsa rona jaaka Mofarisai, mme mongwe le mongwe wa rona a ikanye bopelotlhomogi jwa Modimo ka fa tsholofetsong ya gagwe jaaka mokgethisi, yo o ikopetseng, a re: “Intshwarele, nna moleofi!” Amen.

9. Thapelo: Morena, Modimo, Rara yo o mo legodimong, re a leboga, re lebogela lefoko la gago le re tswang go le utlwa kajeno. Morena, o re abele Mowa o o Boitshepo wa gago gore le rona re se ka ra iikanya, le e seng ditiro tsa rona. Gape re a kopa gore ditiro tsa rona di nne maungo a a supang tumelo ya rona, dithapelo tsa rona di nne bopaki jwa boammaaruri jwa gore re ikanya bopelotlhomogi jwa gago fela ka ene Jesu Keresete, Mopholosi wa rona. Amen.

Thapelo ya Morena: Rara wa rona yo o mo legodimong ...

10. Sefela sa 179 - 162/169

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke F. J. Mtshali, ka ngwaga wa 2015.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.